

REGIONAL NEWS

HEADLINES:-

1. Agriculture & Farmers' Welfare minister Pu PC Vanlalruata'n kuthnathawktute buh leh bal leh thlai chin insurance tihsak a nih dawn thu a sawi.
2. Mizorama Myanmar raltlante mit-naute leh kutze thla lak (biometric enrolment) kalpui mekah za zela 40 point 37 tih zawh tawh a ni.
3. Champhai district Police ten tukin khan Chhungte dai-ah heroin kg 1 leh gram 627 bakah a neitu ni a rinhlelh Myanmar mi 2 an man.
4. Durand Line-a Pakistan leh Taliban-te inbeihnaah Pakistan sipai 50 chuang an thi.

<><><>

CROP INSURANCE

Agriculture & Farmers' Welfare minister Pu PC Vanlalruata chuan kuthnathawktute buh leh bal leh thlai chin insurance tihsak a nih dawn thu a sawi a, Thingtam tuar mekte erawh chuan insurance hi a hmang tangkai hman dawn lo a ni a ti.

Akashvani Aizawl zawhna chhangin Pu PC Vanlalruata chuan 'Crop insurance' titu tura tender koh a nih thu leh a chhang hniam ber chu Zirtawpni khan thlan fel a nih thu a sawi a. Insurance atana pawisa chawi ngai (premium) hi sorkarin za zela 90 tumsakin kuthnathawktute'n za zela 10 an tum ve dawn a ni a ti a. Crop insurance hi chinfel chung hun a duh avangin kumina sazu puangin an buh leh bal a ei chhiatsakte'n an hmang tangkai hman dawnin a lang lo a ti a, chutih lai chuan disaster management & rehabilitation department-ah Thingtam avanga chhiatna leh tawrhna hi Mizoram chhunga chhiatna thleng bik (State Disaster Specific) a puang tura ngen a nih thu leh hei hi tihpuitlin a nih chuan sazu puan avanga an buh leh bal leh thlai chantute chu tanpuina pek dan a awm theih a rinawm thu a sawi a ni.

Minister chuan rawthing tam avanga sazu puang tirem tur hian sazu tur hmanga sazu hrai leh thang hmanga man hna thawh chhoh zel a nih thu a sawi a. Khaw hrang hrang, zazu puanna-ah te chuan Agriculture department hnathawkte leh kuthnathawktu tangrualte chuan sazu hrai hna an thawk mek reng a ni, a ti.

Thingtam lo thlengah hian district 11-a khaw 130 vela loneitu mi 4,000 vel thlawhmma chu sazu puangin a tichhe nasa hle a. Thlawhmma lakna ram hectare 6,869 chuanga hectare 1,737 chuanga sazu hian buh leh thlai a seh a. Tai (buh thar-rang) leh buhpui an seh nasat ber laiin vaimim, fu, behlawi, sawhthing, bawkbawn, hmarcha, mai, chhawhchhi leh fanghma te an tichhe tel bawk a ni. Sazu tur hi Bromadiolone leh Zinc Phosphide te an hmang ber a, chuti chungin district thenkhatah chuan duh khawp hman tur a awm lo ni a sawi a ni a. Hei bakah hian sazu thahna atana Mizote'n an hman tlanglawn sairawkherh bakah thang chi hrang hrang - vaithang, mangkhawng leh thangchep te hman a ni bawk a. Agriculture department hnathawkte chuan sazu-in an hriat theih loh na'n thang chi hrang hrangte hi hman thlak thin turin kuthnathawktute an zirtir a ni.

TRUCKERS

Kolasib district a lirthei hmanga eizawng pawl hrang hrangte chuan Vairengte leh Sairang leh Kolasib leh Bairabi inkar kawng chhe lutuk chu sorkar thuneitute'n October ni 19 thlenga an la siamthat loh chuan he lai kawnga tlan tawh loh an tum.

Mizoram Tipper Association (MTA) Kolasib district leh Kolasib District Drivers' & Owners' Joint Action Committee te chuan nimin khan thu chhuah siamin a ,Mizoram chaklakna ber Vairengte leh Sairang inkar leh Kolasib leh Bairabi inkar kawngpuite chu lirthei tana zawh hlauhawm khawpa chhia, vanduaina thleng thei a ni, an ti a. Lirthei khalhtute'n harsatna namen lo an tawh mek ani an ti. He lai kawng pawimawh tak hi siamtha thuai turin ziakin Kolasib bawrhsap hnenah nimin a an thlen thu leh a copy hi Kolasib district SP leh Kolasib a National Highway Division EE te an pe bawh tih sawiin, lehkha-ah hian tun leh October ni 19 inkar chhunga kawngpuite hi siam that a nih loh chuan an lirtheite an tlan tawh dawn loh tur thu an ziaktih an tarlang ani.

Kar kal ta lama ruah sur nasa avang khan he lai kawng chhe tawh sa hi a chhe leh zual hle a. Lirthei tlu leh tang a tam hle ni a thudawn a ni.

He tih lai hian tukin dar 8.30 atanga chhiar leta darkar 24 chhung khan Kawnpui atanga Aizawl lam pan lirthei 578 chhuah a ni a, Sairang peng leh Mualkhang/Kamrang inkar atanga phai lam kal tur chhuah a awm lova. Khamrang-ah phai lam pan tur lirthei 263 a tangkhang mek a, Aizawl lam pan tangkhang erawh a awm lo ani. Mizoram Truck Drivers' Association (MTDA) hruaitute sawi danin kar kalta laihawl vela ruahsur avang khan Sairang leh Kawnpui inkar kawng chhia lutuk hi a nal zual hle a. Truck ruak thenkhat kal thei lovin tlu leh kawng nala tang an awm tam hle a ni.

MTDA president Pu H Laldingliana chuan naktuk hian an pawl hruaitute an inhmukhawm tur thu a sawi a. Tun hnai a kawngpui dinhmun an enin a chhiat leh nasat tawhzia an zu hmu tih a sawi a. Kolasib a lirthei a eizawng pawl pahnihte thutlukna hi an zawmpui ve leh ve loh tur chu naktukah thutlukna an siam dawn thu leh hetiang thilah chuan tan rual zel ni se tih chu a thuphunga thu dah a awm thu a sawi a ni.

<><><>

BIOMETRIC ENROLMENT

Mizorama Myanmar raltlante mit-naute leh kutze thla lak (biometric enrolment) kalpui mekah za zela 40 point 37 tih zawh tawh a ni.

Home department hotute sawi danin Zirtawpni thleng khan district 11 a awm Myanmar raltlan 12,621 te mit-naute leh kutze thla lak tawh a ni a. Sorkar chhinchhiah dan chuan tunah hian Myanmar raltlan hi Mizoramah mi 31,265 vel an awm mek a. Mitnaute leh kutze thla lak hna hi July thla tawp atang khan tan a ni tawh chungin a lakna khawl fel lo a awm thin bakah internet signal a awm that loh avangte-in kalchakpui harsa an tih thu district thenkhata he hna thawktute chuan an sawi a. A bikin khaw kilkhawr deuhah harsatna an tawh nasa zual niin an sawi a ni. Raltlan awmkhawmna bika siam relief camp a awmte biometric data lakkhawm a awlsam deuh laiin mahni chungte leh thiante bel bakah in luaha khawsate awmna a inkarakik avangin hna a hautak zual niin an sawi bawh a. Myanmar raltlante biometric enrolment kalpui zawh hnuah hian Bangladesh raltlan mi 2,000 chuangte pawh hma leh tur a nih dawn thu an sawi a ni.

Kum 2021 February ni 1-a Myanmar sipai Commander-in-Chief Gen. Min Aung Hlaing-a kaihruaite'n mipui thlan sorkar thuneihna pawng chhuha sipai sorkarna an din hnu hemi kum vek March thla bul atang khan Myanmar atang hian raltlan an lo lut tan a. An tam lai berin mi sing nga an chuang ni a hriat a ni.

<><><>

PRESBYTERY

Presbyterian Church of India Mizoram Synod hnuai Inkhawmpui lian ber dawttu Presbytery Inkhawmpui Ningani zan atanga Mizoram chung leh pawn hmun hrang hranga hman mek chu zanin hian a tiak ang.

Ningani khan Nomination Committee, Finance Committee leh Sub - Pastoral Committee-te an thu a, Kohhran Upa thlan tharte Exam buatsaih a ni baw a, zan inkhawmah Palai lawmna leh Pastor Bial Report ngaihthlak a ni. Zirtawpni leh Inrinni khan Rorel Inkhawm neih a ni a. Presbytery thenkhat ah chuan Inrinni chauhah Rorel an awm baw. Zan lamah vantlang Pathian biak Inkhawm buatsaih thin a ni a. Vawiin chawhma-ah Upa Nemngheh Inkhawm a ni buatsaih a ni a, chawhnu-ah Lalpa Zanriah Sakramen leh Upa thite sunna inkhawm hman a ni a. Zaninah hian Presbytery Moderator kalchhuakte'n Valedictory Sermon an sawi ang.

Mizoram Presbyterian Church Synod hnuai-ah hian Presbytery 47 awmin Pastor bial 298 a awm mek a, kohhran member nuai 6 sing 2 leh 7,719 (mipa nuai 3, sang 4 leh 304 leh hmeichhia nuai 3, sing 2, sang 3 leh 415) an awm mek a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

HEROIN HAUL

Champhai district Police ten tukin khan Chhungte dai-ah heroin kg 1 leh gram 627 bakah a neitu ni a rinhlelh Myanmar mi 2 an man.

Champhai district Police hotute hnen atanga Akashvani Aizawl-in thu a dawn danin heroin hi tukin zing, zanlai pelh dar 1 vela man a ni a, a neitu ni ngei a rin Lalvulmawia (42), Letpanchawng, Myanmar, tuna Zokhawthara cheng mek ni a inchhal leh Lalruatsuma (34), Khawthlir, Myanmar nia inchhalte chu an man a. Myanmar atanga ruihhlo rawn phurh luhna atana an hman ni a hriat Lalruatsuma scooter pawh man tel a ni. An ruihhlo man hi cheng nuai 49 hu thelh ni a chhut a ni.

Mimante hi Narcotic Drugs & Psychotropic Substances Act, 1985 section 21(c)/25/29 ND&PS Act leh The Immigration and Foreigners Act 2025 section 21 hmangin thubuai siamsak an ni a. Vawiin khan Champhai district court-ah hruai an ni a, Police-te dil angin court chuan thil chhui zui a nih theihna atan leh thu zawhfiah zui atan darkar 72 chung Police kuta awm turin thutlukna a siam a ni.

<><><>

BHARAT SERIES

Transport department chuan India ram puma lirthei registration hman tawm theih Bharat Series (BS) number 139 an pechhuak tawh.

Akashvani zawhna chhangin Transport department hotute chuan Ministry of Road Transport and Highways in kum 2021 August ni 26 khan thuchhuah siamin BS number chu hemi kum vek, September Ni 15 atanga hman tan tur a nih thu an tarlang tih an sawi a. Mizoramah chuan BS number an pekchhuah hmasak ber chu kum 2022 September Ni 1-ah a nih thu an sawi a. A diltu nazawng pek an nih loh thu leh Rule 47 of the Central Motor Vehicle Rules, 1989 in a phut ang document nei te chauh Bharat Series number pek theih an nih thu leh chung mite chauh chu pek thin an nih thu an sawi a ni.

<><><>